



Inatsisartuni ilaasortaq  
Jakob Skade  
/Maani

**Pineqartog: § 36, imm. 1 naapertorlugu apeqqummut nr. 2010-89-imut akissuteqaat**

Asasara Jakob Skade

Aallarniutigalugu apeqquteqaatit pillugu qutsavigerusuppakkit:

Isorliunerusunut nunaqarfiinullu nioqutissanik umiarsuarmik pilersuineq piffissap taamaalinerani nalinginnaasumik umiarsuaqarfiuneq ajortuni siusinnerusumik piaartumillu umiarsuaqartitsisinnanermut periarfissat naalakkersuisut pilersaaruteqarfivaa?

**Akissut:**

Royal Arctic Line-mut akuersissutit maannakkut atuuttut malillugit umiarsuarnut pajuttaatinut angalanissanut pilersaarutit Naalakkersuisunit akuerineqartussaapput. Akuersissuteqarniarluni suliat ingerlasarneranni soorunami Royal Arctic Line-p akuersissummi piumasaqaatit malinnerai nalilersorneqartussaavoq, taakkunungalu angallassinermi piffissaq eqqorlugu tikittartullu akuttussusai naapertuunnersut nalilersuinerit ilaasarput.

Angalanissanut pilersaarutit ukiup atuuffissaasa aallartinnginneranni ukiakkut suliarineqartarput. Pilersaarusiornermi tunngavissat arlallit, soorlu sikuusarnerata oqaluttuarisaanerani paasissutissat, silasiorluni piffissamut tulliuuttumut naliliinerit, aammalu minnerunngitsumik sullitat kissaataat eqqarsaatigineqartarput. Kisianni ukiumi tulliuuttumi silap qanoq innissarpiaa eqqoriassallugu ajornakusoortarpoq.

Kalaallit Nunaata avannaata sineriaani pingaartumik kitaata sikorsui pingaarnertut pissutaallutik, Qeqertarsuup Tunuata avannaanut umiarsuit angalanissaat maajip aallartinnera sioqqullugu pilersaarusiorneqarsinnaasannigillat.

Sikut assingat maajip ulluisa aappaanneersoq (ilangussaq 1) naapertorlugu kitaata sikorsui Sisimiut tikillugu sinerissamut qanittumiippit, taamatullu Tunup sineriaa tamakkerlugu sikorsuaqarluni. Sikut ima issutigaat, allaat Royal Arctic Line-p umiarsuisa sikusiornissamut qajannaallisagaangaluarlutik taakkunani angalatinnissaat isumannaatsuunani.

Aamma sikut assinganni Qeqertarsuup Tunua sikoqanngingajattoq ersarissumik takuneqarsinnaavoq, kisiannili Qeqertarsuup Tunuanut angalasoqassaguni kujasinnerusumi sineriak sinerlugu sikut aqqusaarneqartussaapput. Sikorsuit sinerissamiit ungasissusissaannut ilaatigut anori, naluneqanngitsutut pilertortumik sangusinnaasoq apeqquutaasarpog.

17. maj 2010  
Sagsnr. 2010-030644  
Dok. Nr. 377813

Postboks 909  
3900 Nuuk  
Tlf. (+299) 34 50 00  
Fax (+299) 34 54 10  
E-mail: iaan@nanoq.gl  
www.nanoq.gl

Tamanna tunngavigalugu avannaani aamma Tunumi illoqarfiit nunaqarfiillu umiarsuaqarnissaasa pilersarusiornissaat ajornakusoorpoq, pingaartumik upernaap qaammataasa uku atuunnerini piffissamut qanittumut pilersarusiortoqarsinnaanani, sikut eqimalernissaasa aarlerinaateqarnera annertuallaarmat. Umiarsuit tikinnissaat pilersarusiorneqarsimagaluarluni piffissaq eqqorlugu tikissinnaangippata, tamanna Royal Arctic Line-mut, taamatullu sullitanut, piffissaq pilersaarutaasoq eqqorlugu nioqqutissanik tiguisinnaangitsunut annertoorsuarmik aningaasartuutaasussaavoq.

Pissusiviusut matuma siuliani allassimasut eqqarsaatigalugit illoqarfinnut nunaqarfinnullu pingaartumik avasinnerusuniittunut Tunumiittunullu umiarsuit tikinnissaat aatsaat aalajangersarneqassapput, oqaluttuarisaanermi paasissutissat malillugit angalanerit pisinnaanissaat qularnaatsumik ingerlanneqarsinnaalerpat.

Kiisalu oqaatigineqassaaq, silap pissusaani allannguutit, aamma sikut siornatigumut naleqqiullutik akornutaavallaarunnaarneri oqaluserissallugit suli siusippallaartoq. 2009-mi upernaakkut assersuutigalugu Upernaviup Ummannallu imartai sikoqartorujussuupput. Tamanna tunngavigalugu Naalackersuisut arlaleriarlutik kaammattorneqarput, Royal Arctic Line-p tikittussatut pilersaarutai kinguardeqquullugit, umiarsuup siulliup maajip ulluisa 26-anni tikinnissaa siulleq siusippallaartut naliliiffigineqarmat. Taamanikkut Royal Arctic Line-p umiarsuaasa sikumik aserorterinnissaata piniartunut eqquinerlunnissaa annilaangassutigineqarpoq.

Taamaattumik ukiumi tulliuuttumi sila qanoq pissusilersussanersoq eqqoriaruminaatsorujussuuvoq. Kisianni piffissami angalaffiusumi tullermi qaqugorpiaq angalasoqassanersoq pillugu paasisaqarnissaq Royal Arctic Line-mut kiisalu sullitanut pingaaruteqarmat, ilaatigut sikoqarneranut paasissutissat oqaluttuarisaanermik tunngaveqartut annertuumik malillugit angalanissanut pilersaarutit aalajangersarneqartariaqartarput.

Angalanissanulli pilersaarutit aalajangersarneqareeraangata eqaatsumik aaqqiiniarnissaq ajoraluartumik killeqartarpoq. Assersuutigalugu sikut naatsorsuutigisamit allaanerusumik pissuseqarnerat pissutigalugu piffissap tikiffiusussap sapaatit akunnerinik arlalinnik siuartinnissaa naammassissallugu ajornaatsuunnigilaq, ilaatigut umiarsuit eqqortut atorneqartariaqarmata, aammalu ilaatigut angalaneq imminut akilersinnaassappat nassiussat tunngavigineqartussat naammattussaammata.

Angalanissanut pilersaarutit ilisimaneqareertussaanagerat tunngavigalugu sumiiffinni pineqartuni nioqqutissat allatsitassat Royal Arctic Line-p tikiffissaatut pilersaarutigineqartunut naleqqussarneqartussaapput. Taamaalilluni nioqqutissanik nassiussassanillu ukiomerani umiarsuit kingullit nassatassaannik, angallassinissatut pilersaarutigineqartut aallarteqqinnissaannut naammattunik inniminniinissaq ajornarunnaartarpoq.

Taamaattumik angalanissanut pilersaarutit aalajangersarneqarnerini tunngavissat aalajangiisuusussat arlaqarput. Naalackersuisut ukiut siuliinut naleqqiullugu aamma angalanissanut pilersarusiassat nalilersuiffiginissaanut Royal Arctic Line oqaloqatigisartussaavaat, isorliunerusuni illoqarfiit nunaqarfiillu amerlanerusunik umiarsuaqarsinnaaneritut pilersarusiornissaq ajornanginnersoq paasiniarlugu.

Allakkamat matumunnga ilanngunneqarpoq:

- Ilanngussaq 1 Kalaallit Nunaanni sikut assingat

Inussiarnersumik inuulluaqquilluta

Jens B. Frederiksen